

SIMAN DI CELEBRACION DI WATTY VOS SU 26 AÑA DEN POLITICA



ORANJESTAD (AAN): E siman aki ta den cuadro di e celebracion di 26 aña di Watty Vos den politica. Ya caba tin diferente publicacion a sali demostrando tur e posicionnan cu Watty a cubri durante e 26 añanan cu e tin den politica.

Manera DIARIO a publica siman pasa, Watty a drenta politica na momento cu el y Betico a lanta MEP na 1971. Di prome salida caba Watty a worde eligi cu voorkeurstemmen como miembro di Eilandsraad. Na aña 1973 Watty a bolbe worde eligi cu voorkeurstemmen, pero como miembro di Staten di Antiyas. Dia 20 di December 1973, Watty a worde eligi como Ministro den Staten di Antiyas.


Pues e prome posicion ehecutivo cu Watty a cubri

tabata Ministro di Justicia y alavez Vice-Ministro Presidente di Antiyas.

Watty tabata tin como colega den reino, mr. Dries van Agt cu tabata Ministro di Justicia di Hulanda, y mr. Eddie Hoost como Ministro di Justicia di Suriname.

Riba e fotonan aki por mira Watty cu su colega di Suriname mr. Eddie Hoost y su colega di Hulanda, mr. Dries van Agt cu a organiza un cena pa Watty. Riba e otro fotonan por mira Watty den compania di diferente persona cu el a traha hopi cerca cu nan.

E trayectoria di Watty como politico tabata y ta uno hopi respeta. Watty den e campaña aki na diferente ocasion a menciona e palabranan di su amigo Claudius Phillips: "I know where I am going, but I will never forget



where I came from".

Esaki ta Watty. El hamas a lubida un di su amigonan y su hendenan. Watty den posicion of fuera di posicion ta e mesun Watty. El a nace y biba den Rancho. Aunke Watty tabata un bon estudiante tempo cu e tabata hoben, nunca e tabata tin e suerte di haya un beurs of studie-opdracht.

Awe Watty ta abogado, danki na su propio forza cu e tabata tin pa studia y specialmente danki na su profesor Sr. Tjon Ajong cu a pone tempo disponible pa duna Watty les.

Watty su conseho na tur hoben ta, persevera den bo estudio, pasobra esey ta bo futuro. Nos tur por mira awe cu Watty ta un homber exitoso y un politico sin igual.

Riba e fotonan aki por mira e.o. Watty hunto cu capitan Leo Chance, kende tabata su colega di Justicia di Antiyas den e prome Gabinete Eman. Tambe Watty hunto cu Ronchi Isa, ex-Ministro di Justicia y ex-Premier di Antiyas.

Tambe por mira Watty hunto cu Miguel Pourier, e tempo ey colega di Watty den Gabinete Evertsz y awor Premier di Antiyas hunto cu miembro di staten Rudy Ruman Ellis.

Tambe por mira Watty inaugurando Warda di Polis na Bonaire na aña 1974. Tambe por mira Watty hunto cu Luis Nahr, kende Watty mes a nombra como Procurador General di Antiyas.

Por mira Watty hunto cu Presidente di Corte Superior mr. Haime Saleh, kende awe ta Gobernador di Antiyas. Por mira Watty tambe cu mr. Bergen, kende tabata miembro di Hoge Raad.

Comision Celebracion 26 aña Watty Vos den politica a termina bisando henter pueblo: "Watty ta sigui traha pa bo".

